



SERVISIO METEOROLÓGIKO ANTIANAN HULANDES I ARUBA

Seru Mahuma z/h, Kòrsou, Antianan Hulandes
Tel: +599 9 839.3366 Fax: +599 9 868.3999 E-mail: cur-met@meteo.an

KOMUNIKADO PA PRENSA

UGÙSTÙS 2009: TEMPORADA DI ORKAN PORFIN A KUMINSÁ

E promé tormenta tropikal di e aña aki, *Ana*, a forma porfin riba 15 di ougùstùs, dos luna despues di e fecha ofisial di komienso di temporada di orkan (e promedio di yùni te ku ougùstùs ta 4.2 siklon tropikal). E tormenta tabata parse di bira un menasa pa Islariba i pa e motibu aki durante di oranan di atardi, Servisio Meteorológiko di Antianan Hulandes i Aruba a emití un *Tropical Storm Watch* (Alerta di Tormenta) pa e islanan aki. Poulatinamente e menasa pa e islanan a bai bahando, ora tormenta *Ana* a kuminsá pèrdè forsa. E sistema aki a suak i bira un depreshon tropikal i a sigui un rumbo bastante mas sùit i esaki a tene e sistema hopi sùit di Islariba. Un yobida grandi a pasa ofer di partinan di St. Maarten mardugá di 16 pa 17 di ougùstùs i na airopuerto a midi 20 mm di awa. Durante di oranan di djaluna mainta 17 di ougùstùs, e alerta di tormenta a wòrdu kanselá.

Orkan *Bill* a sigui djis tras di tormenta tropikal *Ana* pero a bira un sistema muchu mas fuerte. *Bill* a tuma un rumbo mas nort, ku a pone ku Islariba no a wòrdu afektá direktamente dor e orkan aki di kategoria kuater. Debí ku tabata antispá resake kousá dor di e sistema aki, Servisio Meteorológiko di Antianan Hulandes i Aruba a saka un Konseho pa (doño di) Boto Chikí i un Atvertensha pa Laman Brutu na Kosta. *Bill* a pasa den mardugá di 19 pa 20 di ougùstùs na un distansia di 500 kilometer nortost di Islariba den direkshon nortwèst. Lokalmente espesialmente na St. Maarten, manera tabata pronostiká, tabatin inkonbeniensia na parti di su kosta debí na e resake formal kousá dor di *Bill*. Un yobida basta fuerte di durashon kòrtiku a desaroyá riba partinan di Sint Maarten pero esaki práktikamente no a resultá den inundashon.

Práktikamente na mes momento ku *Ana* i *Bill* tabata manifestá nan mes, depreshon tropikal number Kuater a desaroyá riba Golfo di Mexico, djis wèst di estado Florida. E sistema aki a desaroyá hopi lihé den tormentá tropikal *Claudette* i denter di 24 ora despues ku el a forma, el a subi kosta di parti nortwèst di Florida, kaminda ku el a debilitá rápidamente.

Tormenta tropikal *Danny* a desaroyá den e último siman di ougùstùs riba parti nortwèst di Osean Atlántiko, ost di Islanan di Bahamas riba 26 di ougùstùs. E tormenta a move den direkshon nortwèst i a parse di bai bira un menasa pa kosta ost di Merka. Sinembargo, promé ku esaki a sosodé, e sistema a debilitá riba 29 di ougùstùs, sin afektá ningun teritorio.

Áwaseru:

Durante di luna di ougùstùs, e kantidat di áwaseru registrá riba islanan ABC a varia bastante, kaminda ku algun stashon di áwaseru a midi mas ku promedio, miéntras ku otro stashon a midi ménos ku kustumber.

E kantidat mas grandi di áwaseru a kai den e fin di siman di 22 i 23 di ougùstùs durante di pasashi di un ola tropikal. Airopuerto Hato (Kòrsou) a haña un total di 42.9 m.m, loke ta práktikamente mes hopi ku e promedio di hopi aña ku ta 41.5 mm. Na Boneiru tambe a kai sierto kantidat di áwaseru. Por ehèmpel na Playa Pabou a midi 19.1 mm riba dia 23 i akinan luna a sera ku un akumulashon di 29.7 mm. Airopuerto Flamingo mester a konformá su mes ku ménos áwaseru i e total pa luna tabata 18.4 mm einan. Esaki ta algu mas ku mitar di e kantidat promedio di luna, ku ta 35.0 mm. Na Aruba a kai na Airopuerto Reina Beatrix 19.2 mm, loke ta 24% bou di e promedio pa ougùstùs ku ta 25.2 mm.

Na St. Maarten a midi durante di ougùstùs 2009 na Airopuerto Reina Juliana, 83 mm di áwaseru. Esaki ta 16% bou di e promedio di luna ku ta 98.8 mm.

Pronóstikonan di áwaseru pa islanan ABC pa e sobrá lunanan di aña 2009 (òktober pa desèmber) ta keda pesimista. Último pronóstikonan ta mostra ku e chèns pa un temporada normal òf mas seku ku normal pa e islanan aki ta 80%. Pa Islariba te ainda ta spera un kantidat normal p'e mesun periodo aki.

Manera ta kustumber, Servisio Meteorológiko lo sigui desaroyo di sistemanan tropikal ku hopi atenshon. Den kaso ku esei ta nesesario lo emití atvertensha na outoridatnan i pueblo di nos islanan.